

ու սերգեիլը և այլ քաղցրահամ պտուղները յայտ-  
նի են ամեն տեղ: Այդ երկրի ժողովուրդը պա-  
րապում է բացառապէս երկրագործութեամբ՝ բա-  
ռիս բուն և ընդարձակ նշանակութեամբ: Այդ  
հարուստ երկրի ժողովուրդը չափազանց աշխա-  
տասէր, նստակեաց, խաղաղ, տոկուն և վերին  
աստիճանի չարքաշ ժողովուրդ է: Նրա ուշքն ու  
միտքը, խելքն ու զգացմունքները կենդրոնացած  
են միայն և միմիայն երկրագործութեան վրայ:  
Ուտիացոց երկրի համբերատար ժողովուրդը սո-  
ված-ծարաւ կմեռնի, բայց ուրիշ երկիր չի գաղ-  
թի և ուրիշից որեւէ ձրի բան ստանալ երբէք չի  
կամենայ: Ուտիացոց երկրի ժողովրդի սիրած և  
պաշտած յատկանիշներն են՝ անդուլ աշխատա-  
սիրութիւն, շիտակութիւն, ասպետական վեհանձ-  
նութիւն, ճշտապահութիւն, հերոսական անվեհե-  
րութիւն և պատուազգածութիւն: Փող և հարս-  
տութիւն դիզելու նպատակով նա երբէք չէ թա-  
փառում մեծամեծ և վաճառաշահ բաղաքներ: Բա-  
գու-թիֆլիզեան երկաթուղու գիծը բացուելուն  
պէս, կրկնում եմ, Կովկասի զանազան ան-  
կիւններից, գիւղացիք թողին իրենց մանգաղն ու  
արօրը և վազեցին Բագու, Թիֆլիզ և ուրիշ ա-  
մենահեռաւոր տեղեր՝ շուտով հարստանալու նը-  
պատակով: Դէպի Բագու արշաւող Հայ գիւղացի-  
ների մասին ամեն օր կարդում ենք մեր օրա-  
թերթերում, որ նրանցից շատերը տարածում են  
յետընկած գիւղերում զանազան տեսակ ախտեր  
և վարակիչ հիւանդութիւններ և խախտում են  
Հայոց տոհմային ընտիր ու մաքուր բարքերը: Եւ